



Mjesec ramazan, imansko nadahnuće i koraci ka popravljanju stanja (Meka)

Hatib: dr. Abdurrahman ibn Abdulaziz es-Sudejs

4. ramazan 1442. po Hidžri / 16. april 2021.

Sva hvala i zahvala pripadaju Allahu. Njega hvalimo, od Njega pomoć i oprost tražimo, i Njemu se utječemo od zla naših duša i naših loših djela. Zahvaljujemo Mu, slavljem neka je, na blagodatima koje ne možemo izbrojati i kojima ne znamo kraja. Svjedočim da nema boga osim Allaha, Jedinog, Koji druga nema i Koji nas je počastio odabranim vremenima, i mjesecom pokornosti i blagoslova, i svjedočim da je naš vjerovjesnik i prvak Muhammed, sallallahu alejhi ve sellem, Allahov rob i poslanik, najbolji i najbogobojazniji čovjek koji je klanjao i postio, i noću ibadetio, neka su na njega Allahova milost, blagoslov i mir, i na njegovu časnu porodicu, i ashabe, predvodnike ummeta, i tabiine i one koji ih slijede u dobročinstvu dok se budu smjenjivali svjetlo i tama.

O vjernici, bojte se svoga Gospodara, jer se bogobojaznošću razbijaju okovi strasti, otklanjaju nedaće i iskušenja od islamskog ummeta i ummet vodi ka njegovom vrhu i hvale vrijednim putem. O muslimani, neka vam je blagoslovljen ovaj mjesec, i neka Allah primi od nas i od vas dobra djela. Zahvaljujemo Allahu što smo dočekali ovaj plemeniti mjesec i molimo Allaha da ga učini mjesecom dobra i blagoslova nama i svim muslimanima, i molimo Ga da ga učini mjesecom sigurnosti, blagostanja i mira za muslimane i cijeli svijet i da otkloni od nas ovu pošast i svaku smutnju i iskušenje, On sve čuje i uslišava molbe. O muslimani, jedna od velikih blagodati u kojoj muslimani uživaju, pojedinačno i kolektivno, jeste nastupanje blagoslovljenog mjeseca ramazana. Evo, ovo je plemeniti mjesec koji je osvijetlio cijeli kosmos svojom svjetlošću i ispunio srca svojim blještavilom i raskošom, mjesec čiji su dani





ispunjeni pobožnošću, i sa čijih se cvjetova šire miomirisni mirisi dobrote i dobročinstva, i o čijim intencijama, tajnama i ciljevima muslimani slušaju s velikom čežnjom i strahopoštovanjem, i čiji se dani “prelijevaju” radošću i pokornošću, i čije su noći osvijetljene učenjem Kur’ana, mjesec koji je odabrao i blagoslovio Milostivi i ovjekovječio Kur’an: “U mjesecu ramazanu počelo je objavljivanje Kur’ana, koji je putokaz ljudima i jasan dokaz Pravoga puta i razlikovanja dobra od zla.” (El-Bekara, 185)

Braćo u vjeri, mjesec ramazan je čisto božansko nadahnuće i dar, koji život muslimana oplemenjuje zikrom i pobožnim djelima, i u kojem jezici izgovaraju umiljate riječi Kur’ana i duše poje rosom posta i svjetlošću noćnog namaza. Allah, džellešānuhu, propisao ga je kako bi musliman obnovio i osnažio svoje pohvalne osobine, nadahnuo se dobrom, napredovao na deredžama imana, uživao u svojstvima dobročinitelja. Mudri Zakonodavac nije se ograničio na formu i formalnosti posta, koja podrazumijeva zabranu konzumiranja dozvoljenih i ugodnih stvari, nego se usmjerio ka ljudskoj duši i njenom uzdizanju i pročišćenju, kao i pročišćenju tijela i njegovom uzdizanju s materijalističkog dna u imanske visine. Zbog toga je On pripisao Sebi ovaj ibadet, mimo drugih ibadeta, kao što se navodi u hadisu koji bilježe Buhari i Muslim: “Svako čovjekovo djelo pripada njemu, osim posta, on je Moj i Ja posebno nagrađujem za njega.” Ibn Kajjim, Allah mu se smilovao, rekao je: “Post je povodac bogobojaznih, štit ratnika i bašča uživanja dobročinitelja i pobožnih. On pripada Gospodaru svjetova, između ostalih djela, i on je tajna između roba i njegovog Gospodara, koju ne poznaje niko osim Njega.” Buhari i Muslim bilježe od Ebu Hurejre, radijallahu anhu, da je Vjerovjesnik, sallallahu alejhi ve sellem, rekao: “Kada nastupi mjesec ramazan, otvore se kapije Dženneta, a zatvore kapije Džehennema, i u okove se povežu šejtani.” Kako je samo velik mjesec u kojem se u obilju spuštaju blagodati i u kojem srca vjernika streme ka najčišćim osobinama. Došao vam je, Allah vas čuvao, mjesec dobiti i postignuća, sa svojom razgalom, darovima, ljepotom, raskoši i savršenstvom. On je časniji od toga da se njegove dobrote i plodovi mogu izbrojati. Vjerovjesnik, sallallahu alejhi ve sellem, prenosio





je svojim ashabima radosnu vijest o dolasku mjeseca ramazana, govoreći im: “Natkrilio vas je veliki i blagoslovljeni mjesec, u kojem je noć vrednija od hiljadu mjeseci.” (Ibn Huzejma i Ibn Hibban) Ovim riječima Poslanik, sallallahu alejhi ve sellem, želio je pripremiti njihove duše, probuditi njihove ambicije i ojačati njihovu volju za činjenjem dobra i neposustajanjem u tome. O ti koji želiš dobro, pristupi, a ti koji želiš zlo, udalji se! Allah u svakoj noći ramazana oslobodi neke ljude od Vatre. Cijenjeni postači, ovi blagoslovljeni dani izvanredna su prilika za preispitivanje vlastite duše, popravljavanje djela, odbacivanje razlika i podjela, uvođenje jezika razuma, dijaloga i mudrosti u našu međusobnu komunikaciju i potpomaganje u dobročinstvu i bogobožnosti. Ovaj plemeniti mjesec daje nam važne lekcije u natjecanju u dobru i činjenju dobrih djela. Da li je islamski ummet uspio sačuvati svijetli primjer sredine, umjerenosti i borbe protiv pretjerivanja, ekstremizma i terorizma, kojim se odlikuje islam kao vjera? I da li se suprotstavio svim oblicima ugrožavanja svjetskog mira i stabilnosti i dao podršku jačanju duha tolerancije i suživota među narodima i da li je kategorično odbacio partijaštvo, rasizam i sektaštvo kao modele ljudskog življenja? Da li se odlučno suprotstavio svima onima koji žele poljuljati njegove temeljne vrijednosti i koji nasrću na nepobitne i kategorične vjerske istine? Mediji i tehnologija imaju važnu ulogu u promociji islamske tolerancije i upozoravanju na djelovanje internetskih portala koji šire devijantne ideje i šerijatski neutemeljena shvatanja. Čuvajmo se izdaje vjere i domovine, i nastojmo ispuniti povjerene nam emanete i sačuvati svoju izvornu islamsku ideju. Ummete posta i noćnog namaza, ramazan je mjesec Kur’ana. Naš Vjerovjesnik svake je ramazanske noći učio Kur’an pred Džbirilom, alejhis-selam. Blago onima koji su svoja srca okrenuli Kur’anu, razmišljajući o njegovim ajetima i pomno ih slušajući, i koji puste suzu iz straha od Allaha. Ramazan je, također, mjesec pokajanja, predanosti, dove i nade. Upućujte dove Allahu i ponizno Ga zamolite za sebe, za svoje porodice, za svoje pretpostavljene, svoju domovinu i svoj ummet, i zamolite Ga da zaštiti muslimanske svetinje i živote, popravi njihovo stanje na svakom mjestu, i pomogne ih, i pomogne njihovu potlačenu braću, unesrećene, zarobljene i prognane, i da





otkloni od njih nedaće i brige, i da otkloni od islamskog ummeta smutnje i iskušenja, bolesti i pandemije, On sve čuje i uslišava dove. Uzvišeni kaže: “A kada te robovi Moji za Mene upitaju, Ja sam, sigurno, blizu: odazivam se molbi molitelja kad Me zamoli. Zato neka oni pozivu Mome udovolje i neka vjeruju u Mene, da bi bili na Pravome putu.” (El-Bekara, 186)

O vjernici, bojte se Allaha, svoga Gospodara, bogobojaznost je suština, cilj i krajnja intencija posta. “O vjernici! Propisuje vam se post, kao što je propisan onima prije vas, da biste se grijeha klonili.” (El-Bekara, 183)

O vjernici, u ovom velikom mjesecu preporučena je požrtvovanost, dobročinstvo i darovanje. Darujte od onoga što vam je Allah dao, otvorite svoje ruke, otklonite brigu od dužnika i ispunite potrebu siromašnih i nevoljnika. “Što god vi udijelite, On će to nadoknaditi, On najbolje opskrbljuje.” (Saba, 39)

Vi u Vjerovjesniku imate najljepši uzor u natjecanju u dobru i preticanju drugih u njemu. On je bio najdarežljiviji čovjek, a najdarežljiviji je bio u ramazanu. “Bio je darežljiviji od blagorodnog povjetarca.” (Muttefekun alejhi)

I neka sve to bude pod pokroviteljstvom provjerenih i povjerljivih instanci, kao što su Centar “Kralj Selman” za pomoć i humanitarni rad i Platforma “Dobročinstvo” za humanitarni rad, i upravo su ove dvije organizacije svijetao primjer pozitivnih inicijativa ove blagoslovljene države i podrške njenih vlasti humanitarnim aktivnostima. Obaveza je svih nas da pomognemo ove organizacije u vršenju njihove humanitarne, zdravstvene, dobrotvorne, ljudske, čovječanske i civilizacijske misije, i zekat i dobrovoljne priloge usmjerimo u sigurne i pouzdane projekte i inicijative, kako ne bi dospjeli u ruke nepoznatih pojedinaca i organizacija, i kako ne bi bili zloupotrijebljeni. Također, od iznimne je važnosti promocija i širenje humanitarne kulture u društvu i učestvovanje u dobrotvornim i humanitarnim aktivnostima u svjetlu šerijatskih propisa i u skladu sa zakonom. O vjernici, hodočasnici Allahove Svete kuće, s obzirom na to da pandemija ovog opakog virusa još uvijek traje, i da smo ramazan dočekali u izvanrednim zdravstvenim uvjetima, preporučuje se





“KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJE
KOJU TOKOM HUTBE ELABORIRA.” (PREPOROD)

HUTBE 

maksimalan oprez i ozbiljnost, i osjećanje vjerske, domovinske, sigurnosne, zdravstvene i društvene odgovornosti, i neoklijevanje, nezanemarivanje i nepopuštanje u primjeni zaštitnih mjera i medicinskih instrukcija, prije svega fizičke distance, izbjegavanje masovnih okupljanja, nošenje maske, dezinfekcija ruku i površina, uključenje u proces vakcinacije, povjerenje u nadležne organe i nenasjedanje na glasine i neprovjerene informacije.

Donosite salavate i selame, Allah vam se smilovao, na Vjerovjesnika milosti i Pravog puta, najboljeg postača i najčasnijeg klanjača, kao što vam je to naredio vaš Gospodar, Gospodar svih svjetova, Koji je rekao: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!” (El-Ahzab, 56)

Poslanik, sallallahu alejhi ve sellem, rekao je: “Ko na mene donese jedan salavat, Allah na njega donese deset salavata.”

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

